



# -Pamebhamε

'Nimlo : 006 'Su : 'Kplotεi :

-Kwε : 2005

'su -bha 'sëedhe -mü

Blowo

## -Wo kpö =bhlözë

'Wuntao bə 'sëedhe =ne -më -kë 'ö =been ü -de -wo 'gü i ?

-Më -kë 'ö 'wo- =been- =Dan -wo 'sloo 'gü i ?

-Më -kë 'ö yaa =been' - 'kwi -wo -nu, =glεε'- -wo -nu, 'Lüma -wo -nu -an gbε 'gü i ?

-Wo =vava -nu 'ö 'kwa -an 'tə pö bhë, -wo -an -də 'kpongtaadhe -todhösü 'gü, -an -bha -kë =bhlözë -sü bhë, -wo -zən 'kpongtaame 'kpekpe wö 'dhiö -sü 'ka.

-Yö -dhe -ma -kun 'pö kö 'kwa- -zən =ne kwa 'kpə -wo 'ö =Danwo 'ka bhë, -yö 'bhee-, 'yö- -bha kö -a -bha -kë =bhlözë -sü bhë 'kwa- -zən me -nu dhë =ne -kə 'ö -wo me 'wo to 'kwa -an -bha 'wun ma -a 'ka bhë -a 'dhö.

-Wo -nu 'ö -Zlan -ya -da 'kongtaa bhë, -a 'bhaa gbε 'yaa

## Kwa -bha =Dan -se 'gü -wun

Kwa -bha 'sëedhe -dëü -dëü =plëözë -nu -wo =been' -sü 'gü kwa -de -wo 'gü. -A -blεεzë -yö -gban =zuö' 'gü bhüö -dhebo -kə -bha. 'Sëedhe bhë, kwa-bha 'sëedhe

## 'Sëedhe =ne -a =been -sü -gen tə -më -ε ?

=bhlözë -yaan zië ö 'bha -ta. Pë 'yi- -dhe ka -gə 'ö tə kö me 'ö -dhö -yö ö -de -wo 'sü -së =ne -kə 'ö -wo me 'wo to 'wo- 'ka -a 'dhö. -A -wun 'gü -yö -dhe -ma -kun kö ü -de -wo bhë 'ü- =daan'-.  
-A -wun 'gü, yi -bha me -nu -wun 'gbeezë, 'wuntao bə 'sëedhe =ne yi- -bho gəu 'dhö kö pë 'ö- -wun to kwa -gə bhë, -ya -ta pa ; 'iin 'zü kö 'wun -nu 'wo kë -na kwa -bha =daanwo pö 'pian -ta oo, Kativəa -se 'gü oo, 'iin 'kpongtaadhe 'kpekpe 'gü kö =kun 'kwa dho -ya kwa tii -bha -a -wun 'gü.

=Ya 'gomü, -yö -së kö 'ü- kë =ne gəən- 'wo- 'tə kpə Samali mi këwun -sëözë 'ka bhë -a 'dhö. Gəən- 'ö bhë -yö -kpən me do -bha ziandhö kö këpəyaame -nu =waa- -gi, -yö

waannu -sü 'ka -kpinng 'dhiö. 'Yö- sü 'yö dhoë 'wo- 'dhe -kë 'yö -kë 'pönöpönö. =Ya kë -be Samali mi =ne yaa nu me 'wo- -gi bhë -a -dhë -be -më 'ö dhoë- kë -o? Gəən- 'ö bhë, -yö -dhö -ga zian -ta 'kpaan 'waawa.  
-A -gen tə 'ö =ya kë ne ü 'ka ü -de -wo =bhlö -ya -a -bha, 'töng 'bhaa -dhö də 'ö =dhəng 'ö go 'se -ta.  
=Ya 'go mu, me 'ü ü -dewo =been' -dhe də, ü -mə 'ü də ü -yayəə -gban -gə. -Bhö kë =ne Samali mi 'dhö, 'ü nu -a -dhë. =Ya kë =ne 'wun 'bhaa -yö ü -gə kö 'üen- =bleε'- yi -dhë, yi -bha dresü 'ö =ne :

08 B.P 857 Abidjan 08




## 'sëedhe -dëü -dëü -nu -bho gəu -sü.

=dhiëkəa -me -nu 'wo- =been' -sü 'gü, 'yö me =daan' -pë -së 'ka. Yi -a -wun -bleε ka -dhë, kö 'kaan ka -de -pë kë 'kaan- ka -bha 'dhə -a -yö plaan 'töng 'ka.

'iin 'zü, 'sëedhe 'në -nu 'ö -an 'tə -bhüö -nu 'dhö =ne, kwa -bha 'sëedhe =been' -me -nu =wa bhə yën -sü -bha -a -bha.

## L'orthographe DAN Blowo

Voici ce que nous pouvons prendre pour savoir lire et écrire en langue Dan.	ε	'pε	déchirer	ö	pö	dire
	εε	=deε	aujourd'hui	öö	=töö'	panier
Les consonnes et les voyelles que vous ne voyez pas ici sont les mêmes qu'en français.		=sεε'	natte	u	'su	lune
	Attention:	en	-gen	pied	un	bun
1. c, h, j, qu et x n'existent pas en dan.	εεn	=gbeεn	long	uun	'yuun	asticot
2. r ne se trouve jamais au début d'un mot.	'ë	'pë	crédit	ü	'gü	intérieur
Voici le reste de l'alphabet :	ə	'kaə	daba	üü	=glüü'-	frotter
Lettres Exemple Traduction	əən	=klëən	entourer	üö	'güö	brûler
Aa 'kaa gale	εa	'kpea	sec	öü	=bhöü'-	tarir
An 'gan tirer	εan	gean	scorpion	-Wo 'dho -kə ( Les tons )		
Aaan =saan' cadeau	gw	-gwö	caillou	1 'lü	ton Haut	arbre
aə kaə perdrix	in	'bin	fleur, image	2 dë	moyen	père
aən daən araignée	iin	'iin	ou	3 =zε	bas	termite
bh -bho cabris	ee	'gbee-	fort	4 -tə	Tombant	Poule
dh dhe mère	kw	=kwa-	main gauche	5 lan-	moyen + tombant	Soleil
ë dë père	ng <sup>1</sup>	gbeng	nuit	6 'Zlaa-	haut-tombant	→Petit frère
	oo	'too	sauce	7 =glaa-	Bas-tombant	→Palmier
	ə	-dhə	amour	8 =laa'	Bas-moyen	→panthère
	əə	=wəə-	singe	9 =See'-	Bas-moyen-tombant	: orange
	ən	'yən	huile			
	əən	=Səən	comportement			



**'Kativā -se 'gü -wun**

**'Wun 'ö-gban gbadhe -kə yaa -bha.**

« Mε yaa yuö kē, kö =kun 'ö pē -bhö. » -Wo kpö =ne -yö -go -Zlanwo 'sēēdhe 'gü, 'yö bə mε 'bhaa -nu 'dhi -an -bha -naazoēdhe -zən -sü 'ka mε -nu 'wo -dhəkē kö 'wo wo -bha -tosēadhe kē wo 'bhaə -nu gban -ta bhē -an -blü 'gü. =li- 'wun giagia 'ka, mε =plēzē =wa wo -de nu gba -dhe -sü -dhē, =waa- kē -dho -an -dhē -mε giagia -nu waa- -an mε 'wo -a =sua -zē, 'wo 'wēü-

-sü mε 'gü -mε 'kpaan 'ka -an -bho 'kou kē -dhe =ya kē 'gbee- -A 'bhaa -nu =ya kē, =blēēdhe 'dhə -sü -wun 'wo- =blē, 'yaa 'dhö kö 'məbhli =saan' -ta pa -sü -mü, 'iin 'zü kö -an 'təsiödhe 'bhaa -mü, 'yaadhö 'zü kö =duē -gludhēmε 'bhaa -mü -an 'ka 'ö dhoē 'dhiö... Pē 'ö 'wo dhoē- kē kö -wo =sua kē mε -gə 'dhiwo 'nεene 'ka 'wo- -zian =mεε -kplawo. -A -kē 'dhö -sü

bhē mε 'bhaa -nu =wa -püö -an -bha 'sə -nu 'gü, 'wēü -sü mε 'gü -kə =suu'- bhē -a 'ka. -A mε 'bhaa -nu -bha tə 'pö yi -dhö yi -bha 'dhə -siēgüdhe -kē. 'Kεεkö -Zlan -kə 'gü -dhe -nu -bha, 'waa mε =daan 'wun =suu'- bhē -a 'ka, 'iin 'waa mε =faan' 'mē -a 'ka. Pē 'ö mε =daan -a 'ka 'ö tə -də 'yename -gbangə -sü. Müü 'sēübhömε -de 'pö, 'waa mε =daan' 'wun =suu'- -nu bhē -an 'ka,

-dewo -wo -də -a -gə 'yēnng 'pö.

Bhii gba -dhe -kə =suu'- =nε =səən yaa -mü -Zlan wö 'dhiö. -Dho 'yename -dhē -sü bhē, yö =nε 'ö -sē, 'yö 'ko trēnng 'piö, kö pē 'ö -bhawun -yöē -pē 'ka, -yaan kē -a 'ka. 'Kεε -a =dhe 'wo- kē -na zlöö =nε, =ya =siē' -kəa. =Wa mε də -gbəu dhö, =kwa kwa -zo kē kwa -de 'piö kö =kun 'kwa dho -püö -an -gə 'sə 'gü.

**'Se 'gla -wun waa - Mε =sləə -pē -wun**

**'Wun 'ö-gban -zo kē kwa -bha blii -wun 'piö -sü -bha.**

Biö 'ö -kē kwa -bha 'se =nε -a 'tə -gbaan 'ka bhē, -wo 'wun 'gbee- 'gü kwa -gə blii -nu 'gü 'tōng =nε -a 'ka. Wü =suu'- -ta -nu 'wo bhē, 'ö sü -kwe 'gblan -bha, -wo 'to -na 'tee. 'Ö sü 'blü kē -sü tōng -da -sü -bha kwe -vuudo =kēnng 'sēisiē 'gəə- 'slaple ö ga -yiisiē (1974) 'ka, biö -wü -blükē -sü -yö =tun dho 'dhiö -kplawo, 'wo- 'sən -nu 'dhəədo 'iin 'zü

'wo- nēnng -nu -bhö Giagia 'ka, wü bhē -yö mε -nu -bha pē =dheədhe -nu 'gü -siö 'ö- -wun 'gü mε -nu -wo -a -blü kē, 'kεε, =ya 'sü -a =nēnng -bha, -a kwi -nu waa -a bun -dhe bhaa -dhe -nu, =wa -an =kaan'- 'kəē, 'nē 'kpə =blēēdhe -mu. -A gbo bhē, 'yua =plēzē 'dhe -mü. -A weng bhē 'ö 'blükēmε 'bhaa -nu 'wo -an -dhe -na dozo -nu bhē, -an

-bha 'piigbeedhe =kēa' =blēēdhe =kēa' pē 'ka. Pē -nu 'wo bhē 'töüdhö, -a -wun 'gü, mε -nu -wo biö -wü -kē -kplawo. Biö -de 'pö, -a -bha -bhöpē 'ö- -bhö -na bhē, waa -a kē -wun =plēzē -wo -zokē blii 'piö -sü -bha -kē =bhlzē -sü -zən kwa -dhē. Sö -nu, 'lü ga =plēzē -nu, 'dhe -nu 'ö- -bhö, 'ö- gbo bhē, 'yö pē =bhεε -pē 'ka. 'Ö söga -nu,

'lüga -nu 'wo =sia, 'wo bhə -a gbo bhē -a 'gü, 'wo -kē =glaa- -lü, 'iin 'lü =vava plēzē -nu 'ka. Pē -nu 'wo bhē, -wo -zokē blii 'inn biö -nu 'piö -sü -zən kwa -dhē, kö =kun 'kwa dho blii -nu -ta -lo 'waawa, kö =kun 'ö 'kwa biö -nu zē 'pö 'kpaan -an -bhö -sü -wun -dhē. 'Ö təə -yö -nu kwa dhē blii -nu -to -sü 'gü kwa -bha 'sēgü.

**'Kpongtaadhe -wun**

**'Kosüdhe yaa 'ö 'ploozē.**

'Sεgə 'wo- -dhe εsüpanyö bhē, -a 'gü -mε -nu -wo 'ta -sü -a -zən -sü 'ka =nε 'kosüdhe =suu'- 'ö gəən- -nu =ple -bha 'ko -sü -sü 'iin 'zü dhoonu =ple -bha -to 'ko -nu -gə -sü 'ö 'wo 'kwεε po -a -gə bhē, 'yaa -sē. Mε -nu 'wo bhē -an -bha 'ka, 'kosüdhe =suu'- bhē, -yö 'gianzē, 'iin 'zi -yö 'kosudhe 'ö -kē =nε

bhə -sü 'dhö -a 'ka, 'iin 'zü -yö 'yee -zē. Bhii, 'kosüdhe =suu'- bhē, 'ö -a -mε =ple 'wo bhē 'wo do, gəən- -nu 'sloo, 'inn dhoonu 'sloo 'ka -a 'ka bhē, -a -bhəa gbe 'yaa -dhö 'kpongtaa. -A mε =ple 'wo 'dhö bhē, -yö -ga -an 'gü 'pö =nε 'wo məa- 'wo 'nē 'kpə.

'Sεgə 'bhaa -nu =wa 'kwεεpo 'kosüdhe =suu'- 'ö -a mε =ple 'ple bun 'dhö do bhē -a -gə. =Wa wo -wo bho mε -nu -ta kö -an mε -nu bhē -an -bha 'nē -nu -wo kē -dhö.

'Wo- pö mε 'bhee- -bha -ya ö de 'flēē- 'gü -sü bhē, pē 'ö -dhi -a -dhē 'ö dhoē- kē, -a -wun 'gü, tōng =dəa' -mü kö -yö ö

-wo bho -an -ta 'wun =suu'- bhē -a 'pa =taa, 'kö -de -kē =nε -yö lē- -wun 'ka 'ö -yε mεa- 'dhee -wa kē. -Tosēadhe mε =nε kwa dhoē- pö =dhē -a -wun 'gü i ? Kwa -məa 'kwa- pö 'kpongtaa -dhe =ya yö yaan =a ?



**-Naadhe 'blöanzë kë -sü.**

'Kpongtaame -nu -bha toseadhe =ya yö yaan 'blöanz- dhë zlöö. -Ka -dhe -ga 'wun kë -kə =suu'- =ne -a 'piö 'dhe. 'Wun =ne -yö -kë Izlelö 'se 'gü, gəon- do bhë, 'yö pö ö -bha dhebo -yö -fεε kë -na ö -bha =duö 'wëü- -wun 'ka. 'Yö	'siö -da wo -bha 'wëü- -da -dhe 'gü, 'ö- -ma 'wëü- 'ö -da mliön =këng' yaaga 'gü bhë, 'yö- 'ple -güö 'töüdhö. 'Siö =dhuume -nu 'wo nu bhë, =dhe 'wo -lo -an -ma 'tεεpa -a =löö 'lü =dheεdhö, 'wo 'wëü- 'dhe 'güö -pin yö, 'ö- me do	-ya pö : « =dhe 'a -ya yuö kë -sü -bha, -a -kwe 'gəə- yaaga 'ö ga 'slado 'ö =ne, 'blöanz- kë -kə =suu'- =ne n 'ka- yö do. » Gəon- =ne so 'ö -da -a 'gü a ? -A -bha dhebo -yö -tazəndhe kë ö =gəon kë -səon -wun 'gü ; polisü	-nu -wo -dhega -na -dhidhaa -wun bhë -a 'gü. Kwa -piën -bo 'kwa- pö : -naadhe -yö -dho me 'ka, 'kεε 'yaa nu me 'ka. -Naadhe 'blöanzë =suu'- =ne -yö ya.
--	--	--	--

**'Wun 'ö-gban -potaasü-wun -bha.**

**'Kozë dən yaa 'ka -sü**

Dən yaa -yö me zë -na -yö 'dho -na -a 'ka 'dhiö -kplawo. -Kwe 2004 'ö 'kwa go -a 'gü =ne, -me -lü -vuu 'gəəple, melü =kënnng -yiisië waa me 'gəəslaple ö ga 'seisië 'wo Dən yaa yö -an -bha. 'Kεε kö -kwe 2003 'ka bhë, me -vuu 'gəədo 'ö ga 'slaple waa me =kënnng do ö -kə do. -Kwe =ple 'wo bhë, 'kwa-an -zəon 'koë, kwa- -yö =ne, 'yua bhë, -yö 'dho -na 'dhiö. 'Wun bhë -yö 'siö -kan me 'glu -wun 'ka. Pë 'ö kwa -bha 'dhiösüsekame -nu -bha -zota	-a 'gü -wun 'ka =dεε 'ö təö kö -a 'yua bhë me -nu 'yö -an kë -na bhë -wo -an yö =va 'ka kö -waan -an 'dhe kë, kö -waan kë 'pönöpönö. -A -wun 'gü -kəlokota =va do 'wo- -dhe 'kponaadhea -dho 'koë- 'wëü- 'wo- -dhe 'kwiwo 'gü : fən mändialö (fond mondial) bhë, -wo blëedhe 'ö- =saan' -da mliön kënnng do ö -kə 'slado (160.000.000) 'gü bhë, 'wo- gbaökë. Kö 'kozë dən yaa 'ka -sü bhë, -wo dhoë 'dhiö. =Kweε- -nu 'wo gbaökë bhë, 'wo	=ne : 'məbhli 'slaple, 'sëedhe -bεen -a 'ka =mazing 'wo- -dhe 'kwiwo 'gü əədinatεε bhë -a 'slado (6), -gbëügbëü 'gəəple (20), waa dhoonu -bha -de -ta 'kun -pë. 'Wo- pö, -yö -dhe -ma -kun kö me -nu 'ö 'yua bhë, yaa -an kë =kun, -wo 'dho -wo wo -takun mεε 'sü, 'iin 'zü, me -nu 'ö 'yua bhë, 'ö -an -bha bhë, -wo -an -bha sə -nu 'tia- -nu 'zlu yi 'siö- 'ka, 'go mü, -wo wo -kə 'zlu 'töng 'saadhö 'ka =saa'- 'ka.
--	---	---

**Bhə -sü =plëezë**

**-Badhongzuöme -nu.**

-Kəlokota =va 'wo- -dhe ONUCI, 'ö -kë 'sεgə 'kpekpe -bha -kəlokota 'ka, 'ö 'dhinaa -ya -da 'sεgə -nu 'gü, 'iin 'sεgə =ple sonngdhö, 'wo -an -kan 'koë, -a me -nu 'wo -nu kwa -gə 'se 'gü bhë, =wa wo -bha =radio 'kə do də, kö -wo 'wun 'ö kë -na kwa -gə 'sεgü zö, -wa -taə bə. 'Sεglawun oo, bhə -sü -nu 'wo -kë =ne (-bhadhong -zuö -sü 'dhö), 'wëü- yö -a 'gü -pë 'slë -dëu -dëü -nu, -wa 'ple -blεε -a -ta.	=Ya 'gomü, -wo kwa =faan' -më kö -ziö me -ta -sü, 'ko-nu -bhawunto -sü bhë kö 'kwaan- =klang kë, kö -dhikoë -yaan da kwa sonngdhö kö =zuögludhi -yaan nu kwa gə 'se 'gü. -Dhe -nu 'ö =radio bhë 'ö- 'dhiö -yö to -bha 'wo ne : Bigia, Buake, 'Dadhə, 'Kədhokə, 'Yomoklə, 'Maadhö, =Odiene, =Dauklə, =Bənduku, 'Sanpedro, -Dukwitaa. 'Ka kë -ka ka 'toto -a -bha. =Ya kë 'to -wo 'wun -blεε kwa	-de -wo 'gü. Me 'wo wo 'toto -a -bha -kplawo =wa -da melü mliön -yiisië 'gü 'saadhö. =Radio 'kə bhë, -a də 'ö -zo -kë 'sεpiöme -nu -bha 'slë -zəon -me 'wo =mleken -se 'gü 'wo- wo bhë, -a -gen təö kö -yö kë me 'saadhö -bha 'toto -a -bha -pë 'ka. Yi ka =faan' -më kö 'ka ka 'toto -a -bha yi 'saadhö 'ka. Ka zuö =duö ka 'toto =dhia
---	---	--

**'Yee -wun**

Yi do 'ka, 'ö gəon- =klöö do -yö dho -bhodhea kë =dhia 'ö gbö 'piö 'Kwi -se do 'gü. Gəon- bhë, -a -bha -dho 'kwi =plöö -sü -blεεzë -mü. 'Məbhli 'wo -ya -a 'gü bhë, =dhe =wa	'ta 'sü =wa 'dho, 'ö 'məbhli 'ne do -yö -nu 'ö -ziö -an -ta 'wa 'vü dhö. 'Ö gəon- bhë, 'ö- 'yan to -a 'piö 'wa 'dəəndhö, -ya -zo 'piö =ne 'məbhli -nu -wo -kpea -sü =ne me 'dhö	-be. 'Yö- pö : -ə ... 'məbhli 'në 'ö 'ü =tun 'tee =kun ü -bla -sü -kə 'dhö =ne, 'bha kë =va =sia, ü -dho -bla sü 'zü -ziö =gəü -sü -zë =duö =dheε... 'Ö me -nu 'wo- -wo ma bhë 'wo -pen 'yee	'ka, 'Wo- pö -a -dhë, gəon- =klöö pë bhë -piö -mü 'yaa =kpea.
--	---	--	---

**Kese Alüfənsë**

**-Piën**

Kwa -bha -de -nu kwa de  
-wo -dhë -sü kwa =faan' 'ple 'ka  
=naa'- 'ka bhë, 'Gomü 'zü kwa -bha  
-kpa pamebhamë -bha -sü 'kwa- pö  
-kplawo bhë, kwa- -kë -së. Kö =kun

**<<-A -kun 'gbee me 'ö =tröän -së yö. >>**

'ö kwa 'gü -yö ga -a 'ka. -Kö do 'ö  
poo =glöö yö -dhö -yö -tö gön  
-kë -a 'ka, 'ö -dhe -yö 'po -na kö -yö  
=dhedhaa bho -na -a 'ka bhë, -kö do  
bhë -kwaa këa kö kwa -de -wo pö

-dhö, -a =daan' -dhö waa -a =been'  
-dhö -yö kwa kë -a 'ka.  
-Yö kë 'dhö kö pë 'ö -gban kwa wö  
-bha bhë 'kwaan- pë dö -a -bha.

**'Wun -tao**

1)- 'Sëedhe -be 'në -nu 'ö -an -yö plaan -sü 'yaa =gbeän gbö 'wo =ne :

- 1) **" Yesu Klito tao 'kpongtaame -nu Dhame "**
- 2) **Yesu 'Klito -bha me =daan' -wo -nu**
- 3) -A me 'ö -gban 'Lükia -bha me kë kö waa- -a 'dhe kë -kö -bha 'Wo- -dhe : **=Göö- waa- 'lükia**
- 4) **'Yua =plëezë waa- ö 'dhe kë -kö -nu**


2)-

=Ya 'go mü 'zü, =klang -së  
'bhaa 'ö -gban 'me 'ö- =zuö' =ya -gi,  
-a 'wun kë -kö 'wo dhoë- këa, kö -a  
=zuö' -yaan -püö -a -bha, -a =klang'  
bhë 'wo- -dhe : « =zuö' 'gü bhüö  
-dhe bo -kö ». =Klang' bhë -yö -dho  
kë =Daan' 'segö 'gü. -A do -yö -dho  
kë- -Zuöngwiö, 'su 'ö 'kwa- -dhe  
'kplotei 'ö 'kwi -nu-wa -dhe zue

(Juillet) bhë, -a -dhekpäyi 'göople  
ö ga 'söadhü (25) 'ka 'ö yöë  
-dhekpäyi 'gööyaaga (30) -bha. -A  
-da plöö -yi 'ö tao dhekpäyi 'göople  
ö ga -yiisië (24). 'Ö- do 'bhaa -kë  
=Daan' pö- yaandhe gia- -bha.  
-A -da plöö -yi 'ö tao  
'kpotëi bhë -a -dhekpäyi 31 'ka,  
'ö =klang' züdo 'su 'ö 'kwa- -dhe

-Dödhë 'ö 'kwi -ya -dhe Utö (Août)  
bhë -a -dhekpäyi -bleezë (1) 'ka, 'ö  
dho 'ö yöë -dhekpäyi 'slado (6)  
-bha. Me -nu 'wo ka =dhökë bhë, yi  
ka =faan' 'më -na kö 'ka kë =klang'  
bhë -a -ta =va, 'ö tao pë -së -ya 'gü  
=va.

**Pë 'bin =ple 'wo =ne -wo-bhö wo 'köë- 'keë -a do =zaadhe 'sleaga -ya -bha-an =mee'-**



'Ka yën 'sëedhe =ne -a pö -sü -bha -ka ka -bha -zotadhe -nu bö yi -dhë. Yi 'yan -yö ka -bha 'sëedhe -nu -gö.

Me -nu 'wo 'sëedhe 'ö =ne -a =beän-an 'tö 'wo =ne Sai Zoziäsü, -Kese Møyän, Zafe 'Dhöggbö, Valangten  
Vidrinö waa- Edhena Pedhekwalösökaya 'wo go Lusi-se 'gü 'ö yöë Hanesü 'ö go suisü -a -bha.  
Yi -bha 'sëedhe kë -dhe 'nimlo 'ö =ne : SIL 08 BP 857 Abidjan 08 Tel : 22 43 12 72